

Legija pokrenula prve proteste protiv NS BiH 2002. godine

14/04/2011 22:13 by Administrator

FIFA je ovih dana osnovala komitet za normalizaciju Nogometnog saveza BiH, nakon što su odgovorni u Savezu doslovno sahranili bh. nogomet, koji je i zvanično od 1. aprila isključen iz evropskih i svjetskih takmičenja. Sjetate li se prvih protesta protiv NS BiH u Sarajevu, septembra 2002?

Klika u Savezu održala se uprkos višegodišnjem negodovanju prvenstveno navijača reprezentacije BiH, prozivanjima na tribinama, pokretanju kriviničkog postupka protiv ljudi iz Saveza zbog pronevjera i zloupotreba položaja...

Sarajevo-x.com vam predstavlja novinske članke o prvim protestima protiv NS BiH u Sarajevu, koji su uslijedili nakon skandaloznog zakazivanja prijateljske utakmice sa tadašnjom SR Jugoslavijom, čija je uloga u proteklom ratu u BiH dobro poznata. Proteste protiv Saveza je nakon te utakmice na Koševu, koja je odigrana 21. augusta 2002. (BiH - SR Jugoslavija 0:2), pokrenulo Udruženje građana "Legija". Članovi tog udruženja tražili su, zbog loših rezultata i malverzacija, ostavku rukovodstva Nogometnog saveza, te pozvali sve navijače u BiH na protestno okupljanje pred tadašnjom robnom kućom "Sarajka" 6. septembra 2002, pred kvalifikacijsku utakmicu sa Rumunijom na Koševu.

Grad oblijepljen plakatima

"Protestnom akcijom do NS BiH i čitanjem protestnog pisma izraziti ćemo nezadovoljstvo zbog ponižavajućeg odnosa vodećih ljudi NS BiH prema reprezentaciji i navijačima", stajalo je u pozivu "Legije". No prije protesta grad je oblijepljen plakatima kojima se tražilo odstupanje tadašnjeg predsjednika Jusufa Pušine, generalnog sekretara Muniba Ujanovića, ali i odstupanje ljudi kojima nikad nije i nije trebalo biti mjesta u nogometu.

Naravno, članici Saveza brzo su se "snašli", nazivajući organizatore protesta "Crnom Legijom" koja zloupotrebljava djecu Sarajeva, odnosno "hučka navijače da demonstriraju i ružilački pomognu i doprinesu nedolasku navijača na stadion i uspjehu naših reprezentativaca koji bi trebao uslijediti iako je Rumunija visoko rangirana na listi FIFA".

Iz "Legije" su odgovorili: "Mi ne zloupotrebljavamo djecu Sarajeva, mi jesmo djeca Sarajeva", te dodali:

"Ružilački i 'hučka' pozivi navijača svode se na 20-ak plakata i mirnu protestnu akciju koji su uplašili vodeće ljude NS BiH, što najbolje pokazuje koliko se boje i kakvim se sredstvima bore za očuvanje svojih pozicija. Uspjesi i rezultati koje navode upravo su nas i natjerali na ovakav dostojanstveni čin traženja smjene rukovodstva NS BiH! Jer, u NS BiH se mijenjalo sve osim onih kojima tu nikada i nije bilo mjesto. U narednom periodu, kao uostalom i uvijek, reprezentaciji BiH želimo svu sreću svijeta (i Evrope), ali dok se ne ispoštuju zahtjevi naša građana i navijača BiH oni neće imati našu podršku".

Trajno ukloniti iz nogometa

I, bez obzira na to što se na protestima 6. septembra 2002. okupilo svega desetak navijača BiH, već na utakmicu protiv Rumunije došlo je znatno manje navijača nego inače, a tu utakmicu glatko smo izgubili 0:3. Kulminacija bojkota reprezentativnih utakmica desila se samo mjesec kasnije, 11. oktobra 2002. kad je na prijateljski susret sa BiH na Koševu stigla reprezentacija Njemačke. Utakmicu je pratilo jedva nekoliko hiljada gledalaca, a gosti iz Njemačke vjerovatno nikad nisu i neće igrati pred praznijim stadionom. No, ni bojkot navijača, ni prazne tribine nisu smetale ljudima u Savezu da nastave sa svojom destruktivnom politikom, koja nas je na kraju dovela do suspenzije, a koja bi ih, barem se tome svi nadamo, trajno trebala ukloniti iz nogometa i sporta uopšte.

BLUSRCU.BA - Stranica za sve banjalucane sirom svijeta!

<http://blusrcu.ba>

Cijelokupni tekst sa slikama pod ovim linkom: www.sarajevo-x.com/sport/nogomet/clanak/110414044#

Izvor vijesti: Sarajevo-x.com